

淮海英靈續集

淮海英靈續集

鄉人阮亨輯

宗學曾

字德永號醴陵江都人梅岑子王柳村云曾祖名世夢江淹以三彩筆授之因名文江復改學曾二

王公亟重之  
著丹山集

漢皇迎春歌

衣青衣戴青幘虎賁期門羅畫戟漢宮鹵簿出迎春絳扇金  
根氣象新勾芒土牛夾道陳風伯雨師爲掃塵六街九陌蒲  
桃錦陽春已到鴛鴦枕繡戶宮娃萬萬家嬌鶯欲嚀桃李花  
天子歸臨德陽殿黃龍嗽水霧成霞九光燈下祈王母甲帳  
琉璃煥星斗黃鵠暖飛太液波漢皇自制芝房歌

癸丑重九

甘旨荒村缺家貧子道非且沽樽酒至共把菊花歸聚會期  
難得歡娛興不違情親皆骨肉同舞老萊衣

俞維植

字聖成號學耕泰州人

放歌行

猗嗟哉男兒坐愁一室真可哀夜半呻吟四壁靜不能乘風  
飛上黃金臺猗嗟哉彼蒼彼蒼抑何困我離奇放浪之形骸  
十年事業頗潦倒青雲折挫亦云早大風拔起東海椿繁霜  
壓死北堂草巢覆應嗟則不完驚濤況打鴛鴦鳥二十不干  
謁三十無適從霹靂颺颺無時無腰間徒有雙芙蓉君不見  
敝裘歸來蘇季子旁人大笑不知恥又不見終軍年少不讀  
書出關游俠能棄繻孳孳事黃卷英雄無乃爲蠹魚舞  
我劍飛赤電撫我琴謾沈吟一喜復一怒天下無知音無知  
音且狂走平生志氣復何有崔嵬立馬心轉傷茫茫烟水空  
回首

施震鐸

字瞻齋號千  
里泰州諸生

客中寄兩大人

風聲初釀冷遊子正思歸細雨關河隔孤燈色笑違音書還  
驛路魂夢只親幃夜夜高堂舞難忘五彩衣

同內子周瑤石分選驪珠集

誰言續史只班昭舉案梁鴻豈寂寥剪燭分題聊卒歲揮毫  
索句坐良宵閨中畏友時相對閣上詩人不待招多少牢騷  
憑汝遣倚欄何必聽吹簫

陳志科

字宗四號法海士  
坤曾孫江都諸生

偶步

杜門常習靜偶步到城西新竹綠生粉落花紅作泥山光浮  
水動樹色帶烟齊爲惜春將暮來朝還杖藜

陸國慶字雲升號景庵如臯貢生賢有司皆式廬商政令得失呼爲畏友著半舫吟就政堂諸集

初春偕梁溪吳元音閒步

東郊偕素侶閒咏率天真黃鳥聲何早青山氣欲春柳絲繁  
去棹花意媚遊人遙望烟深處漁翁理釣緝

鄭叔元字建遠江都人

歸舟

返棹鑾江落照低長堤無那草淒淒春來時有還家夢付與

東風杜宇啼

汪之珩字璞莊如臯職監生好客工詩築文園延名俊嘯咏其中有文園六子倡和詩輯邑中耆舊詩名東

臯詩存于春田重加纂輯時稱善本

酬王春明

倘不嫌蔬食荒園可當歸洗桐添牖翠愛竹破苔衣相與看

春水投閒坐釣磯爲言諸伯仲文酒得飯衣

周永安

字晴溪  
泰州人

送蔣大歸里

歧路正殘陽鶯啼一斷腸三春爭送客正馬獨還鄉風雨羈  
愁遠烟花別夢長河梁此分袂初月又蒼蒼

春日集義堂雅集

蠟屐投深巷來過處士家蝶飛芳草碧鶯喚夕陽斜地僻風  
生竹霄清月在花主人情意好共客煮新茶

鄒之璜

字爾佩號楊  
庵寶應人

偶拈

安仁入市看不厭太沖行來唾其面愛妍嫉惡理之然試看  
策馬長安道春風翩翩多少年

談震德

字青令號雪  
山江都人

野宿

客程時野宿輕舸似眠鷗  
水涸江方定山深稼始秋  
星臨梅埔正月過竹崎流  
生事嗟遲暮天涯况白頭

洪嘉植

字秋士江寧人江元卿  
云秋士儀徵人工五言

秦淮竹枝詞

桃葉桃根渡口歸  
荷花盪藥錦鴛飛  
垂楊夾道珠簾下  
十五女兒白苧衣

洪鶴年

字聞九  
江都人

平山堂春眺

朱相祠堂近列星  
平山猶似醉翁亭  
溪從畫舫行邊綠  
天向垂楊盡處青  
百折烟雲披繡幕  
一灣臺榭逐花汀  
憑高始信

江南好曲曲春山倚翠屏

孫

奎

字斗泉通  
州貢生

中秋對月

有家常作客令節每空過月是今宵好愁如此夜何病餘雙鬢減貧極一身多展轉懷難遣停杯懶放歌

卓爾壇

字子升  
江都人

仿園

秋水拍天明空亭敞客情簾勾新月曲橋枕碧波清歷落行杯竿紆迴弄笛聲蕭蕭高柳外遙見衆山橫

陳志襄

字陶思泰州監生入成均爲徐立齋  
祭酒賞識著淡定齋謙忍居諸集

夏日簡鄧丈孝威

憶與君別時乃在客歲春讀書江都祠邈若越與秦非無風



帆便託足奉清塵姻戚相攀援含情竟未申去冬堅冰阻薄  
作歸舟隣方期敘契濶斟酌焚枯鱗而公憂足疾言笑苦無  
津歸來當歲暮軼掌難爲親遂令長者別荏苒及茲晨人生  
不相見每嘆參與辰矧伊金石交能不懷酸辛柴車夙云駕  
思將良晤因不知羲皇侶曾否念故人

中秋鑾江邸舍懷黃仙裳表兄

四序愛佳辰茲宵愈可惜露白意驚秋風清月似璧蕭蕭旅  
館吟商聲奏金石誰是賞音人共坐江天碧

得呂丈半隱蜀中消息

交情聚首重相於及到分攜意總虛豈意瀼西歸萬里不忘  
海畔寄雙魚新阡暗續滄桑淚墟里遙聞枳棘居見說鵲鴒  
風翮健可能東洛駕柴車

楊衡選

字聖藻涇陽人江都貢生與魏叔子孫豹人孝穆交篤著披香文集父蘭佩子帝右

送員虞肱

我本秦中人來遊邗江上羈棲數十載車馬未西向每憶潼關路中夜倍惆悵鍾儀發南音楚奏何其亮君今念先疇歸省心方壯內謀恐有違外議慮多謗脂車出就道觀者悉相望春風三月天鶯花夾行仗崆峒有遺書爲我一相訪

王勿華給諫典試廣東使道過邗上

舟迴東粵地山入畫圖看春靄雲烟近霜清曉日寒柳條垂曲岸花氣辨崇蘭知有登攀處晴光映豸冠

于元瑾

字鍾懷號曉江江都貢生官靖江訓導著韻閣集

西郊訪菊

已遠龍山會攜尊就菊花淡香宜晚發幽艷不春華籬落綠

村曲江流帶郭斜此中看未足步履又隣家

陸

鴻字仲羽興化人父元圖以古文詞名淮南惜不永其年

拱極臺卽事

日暮攀高閣長空衆鳥飛江村明遠火山郭映斜暉波定魚梁靜烟深鷺影微徘徊新月上柳下放舟歸

朱廷察

字在寬如皋人

望月

月尙不嫌客坐深殊獨明星皆甘近侍雲亦避孤清夜半人侵燭更闌欲下城西歸如有待處處曉雞聲

單

迅字兆捷號百雉秦州人黃仙裳婿

擣衣曲

江南秋樹紅一湖江北楊柳黃欲枯新寒已逐新雁至昨夜

明月聞鷓鴣夫婿從征妾獨處西風瑟瑟侵肌膚衣裳猶在  
隔年笥淡妝濃抹皆荒蕪露下天高江水濶臨流顧影傷千  
紆遠戍候經三五載青鸞黃犬何爲乎年年針線無人寄夫  
在燕山妾在吳

王

雅

字正子秦州人下牧亭  
云正子與吳野人詩友

雜詩

瀉酒置杯中表裏色空明此物有深味顧影時獨傾一醉就  
枕席方寸正和平奈何單棲鳥繞樹長悲鳴哀痛爲誰故無  
乃傷伶仃聽之感心曲反側寐不成攬衣失次第強起步前  
楹同病莫我憐覆面淚縱橫

黃鵠巢珠樹六翮生光輝適遇驚風起吹向淮南飛日昃方  
一餐中腸恒苦饑猶是千里才毛羽世所稀蓬蒿暫棲息衆

雀莫相違

百川知天寒凝冰不揚波草木復搖落爾松將如何幸遇雲  
間鶴飛來棲高柯相期守固窮世路盡虞羅

湯起祚

字迪宗號滋人寶應人著春秋  
不傳杜詩箋紀年刪剩稿續稿

秋日光

秋霄空更高萬里同一碧近遠差淡濃四垂有微白鮮皎出  
新澣蒼蒼如自惜薄言采江蘼紉佩矜無斃俯仰澄宇下誰  
似行吟客

生

雲

字霞生號野仙江都人王又村云霞生幼工詩文  
大中丞洪公奇其才特保舉授迪功郎著西湖游

草揚州夢詩集  
多寄興物外語

孤山

清節徹西湖先生得自娛水寒雲氣濕天濶月痕孤梅老人

何在亭存鶴可呼當年高臥處風景未全殊

凌雲亭

四望真無際諸峯不與羣簷低吳苑月檻入楚天雲山暝嵐  
光合江深樹影分坐中松籟發仙樂半空聞

別友

湖海重黃金悠悠行路心唯君存古道何處覓知音柳暗江  
邨晚雲濃野店陰寒蟬聲斷續偏向別時吟

征婦吟

佳期夢後總成虛一自樓蘭十載餘獨有征人歸不準今年  
還是去年書

周

枚

字天臣號鶴  
巖如臯諸生

夜渡揚子

一片輕風送遠帆月明秋水過邗關白門道士今何處笑指

江南山外山

周鳳鳴

字鳴岐號梧岡諸生鶴巖子少從陳檢討游有裴王之目

同張漢乘登江上小樓

客裏共尋秋來登江上樓山橫吳地遠水接楚天流用世腸  
仍熱爲仙訣未求何年謝塵事采藥到瀛洲

詹守椿

字怡陽江都人

過聖僧廟贈處士倪少槐

茫茫泗水雲淡淡嵩塘月一廟冷松杉居人自怡悅老農披  
爛簑談笑霏玉屑不過東西村何况城與闕相對欲忘言胸  
中若冰雪欲買細林山與君共巖穴

施守平

字平子江都人

西湖雜咏

猿鳥清唳寄此心移居何處更山深先生身世清如許那信  
遺棺有玉簪

閔長虹

字在東  
江都人

江行望石城

萬古岷峨水滔滔南國行亂雲盤兩氣崩浪走雷聲六代銷  
金粉三山拱石城猶看春色動禾黍故宮生

訪史千里不遇

欲展殷勤願已違征鴻爭逐去帆飛路迷京雒羈離久人可  
江鄉問訊稀遠別豈應虛濁酒相思空自倚斜暉故交同作  
東山客莫戀明湖獨晚歸

洪必元

字右曾號仿沂如皋貢生  
官贛榆訓導著東湖集



閑適

孤雲隨我身亭亭出物表偶住在人境此中恆了了讀書南  
牖下掩戶甚幽窅叢竹倚石苔古樹枝繚繞好風拂檻來天  
韻觸啼鳥豁然耳目清會心良不少一片晚霞飛流采蕩林  
杪忽與雲相適影光同縹緲

洪必韜

字師渭號清溪仿沂弟監生  
天性孝友里人比之薛包

白沙秋月

百里平沙白橫飛一片秋光涵山色迥寒挾雁聲流細火淡  
漁浦歸帆認遠洲風清良夜候羈客幾搔頭

江源

字岷山  
如皋人

觀菊

偶到幽人宅重過處士家高齋深見月隙地冷逢花丁卯情

偏愜庚申事，尙賒相看食。坐久不覺日西斜。

章純仁

字仁山如皋人

### 重訪孫太華隱居

爲愛孫登宅，重來訪隱淪。道隨流俗變，人覺布衣真。蓬島思乘鶴，桃源許問津。可憐高蹈者，白首未辭貧。

宮鴻營

字東表紫陽太史子著涉園集

### 淮堤謠

淮堤坦坦，淮水湯湯。不入於海，灌我下鄉。

坦坦淮堤，奔濤不遏。冬來築夏來決。

天高可登，虎猛可制。一泓淮水不可治。

宮鴻厯

字友鹿號恕堂紫陽太史子著棣園集舊雨園齊礪紀游金台紀游

### 魯仲連射書處

樂生已歸趙聊城猶抗齊仲連一紙書虜城如拾遺信哉國  
士語賢於十萬師韜光臥東海孤跡何可追戰國標季運而  
有高世姿刑名習申商口舌誇秦儀謀身亦云巧反掌憂禍  
罹微名腐草同長爲萬代嗤

寄懷王乾菴團雲蔚王陵延

薄暮秋林落葉稀荒城暝色靄餘暉爲嗟遠道書難寄却羨  
寒雲鳥獨歸懷抱暫隨流水去蹉跎空與故人違風塵鞅掌  
誰青眼高館多君畫掩扉

張

統

字虞廷號厯山江都人王又村云厯山生  
長朱閏工畫善鼓琴著北光閣詩文集

飲酒

在昔陶淵明門遶五株柳避世獨隱居朝夕唯飲酒採菊行  
東籬吟詩坐北牖我今欲學之閉戶亦已久陶琴不上絃我

琴不離手陶醉固尋常我飲乃非偶

歸鳥

夜夜枝頭鳥定歸不知終日何處飛飛向田間啄禾黍飛向  
酒家食糠粃王子追禽到僧院汝幸不逢王子箭唐生射鴉  
坐殿中汝幸不遭唐生弓身微翅短高復低但到投林日已  
西嘖嘖啾啾遠屋角明朝莫向枝頭落

許彭年

字介眉號鹿村秦  
州人著鹿村集

訪黃儀通不值

爲訪幽棲客行來路未賒北窗喧鳥雀曲徑入烟霞客散茶  
聲歇亭空樹影斜主人何處去落盡一溪花

旅懷

青山策蹇日初沈老大無家淚滿襟况是空林蕭瑟夜消魂

殘月一聲砧

丁

確字子確號石倉如臯人王又村云石倉詩爲李小有杜于皇所推搜輯邑中先輩遺稿名東臯詩滙

著雲園集

其年至自荆谿聞予將赴虞山爲作吳下諸子書

將我涉春江君自荆谿至星車儼在門暫頓南征轡與君傾

一觴繞此經年意酒邊商客游愴我前途悴殷然寫數書情

辭婉而摯一爲虞山吳

蒼符

大陸

載商

及蔣二

公

一爲婁城汪

九

宋玉

庭既

同黃始

靜御

斟酌誠細微此情骨月視奉之懷袖間不

啻千金嗟哉泰山阿桂樹陰其陂春風送別離相思成易

地來朝當奈何且盡今宵醉

髯張西調行

北風夜吼燈花落我坐羈羶神寂寞中堂老客迴生愁買酒

脫却羔羊裘呼余同命酒銷此寒更久座客三五人相逢笑  
開口或言時事於今有是非或溯古昔以來之精微或極詆  
諧類方朔或彈鐵撥追明妃總之客次無聊賴借以模糊驅  
一概獨有髯張慘不舒手捋虬髯發長嘅自言我是關中人  
關中舊事猶能陳不寫伊涼苦離別不學平羌舊損神別有  
新詞號西調中間悽惻傷懷抱請君酌酒爲君歌只恐聞之  
魂料峭座客行觴各不言髯張歌發如哀猿初度沈沈鼓鼙  
死漸響鳴鳴壯士冤嚙喉哽咽血流熱抗聲激烈刀飛雪唱  
到無腔萬馬哀歌殘本調千軍滅一煞移商與換宮停徵變  
角聲沈雄不獨三湘腸欲斷還教西蜀淚垂紅可憐關隴古  
雄鎮百萬生靈齊殞命譜入新詞只益哀編來小令還添恨  
開元莫唱李龜年疑碧池頭淚黯然千年之後說興廢又有

髯張一曲傳髯張髯張且莫唱誰遣中原成版蕩此事分明  
李闖兒攪破山河真孟浪髯張笑謂君莫知區區寇盜何能  
爲從來興廢關天意大約臣工實致之憶昔懷宗宵旰切求  
賢有意如饑渴誰得文章出腐儒盈廷聚訟公私別豺狼當  
道問狐狸燕雀處堂突不移宰相東堂盛絲竹諸侯西第空  
旌旗上公輦翠迴華轂駙馬馱珠入金屋羽檄空馳司馬門  
戰書不報將軍幕請纓小子空棄繻獻策少年徒痛哭大廈  
難將一木支紛紛况屬庸愚兒因茲九社皆淪棄黃巾白馬  
紛相馳我聞此歌心不釋方知我輩無深識七十二代盡如  
斯豈徒李賊恣猖披請君莫唱傷心曲霜氣漫空酒不緣

石

京

字天中號蓉  
邨月川子

遊南邨望呂公墓懷古

吳大司馬呂岱墓在高  
陽蕩中上有楓樹一株

當年仗策鎮雄州名冠江東孰與儔詎意簪纓成往事空餘  
碑碣臥荒邱孤墳寥落烟初暝野樹迷離葉自秋一望南村  
憑灑淚滄桑今古不勝愁

許之男

字蒲瑞號穎川如臯人高介絕俗工鐵筆時以東海道流目之著耕岩集古今篆韻

陪吳耳公先生登石泉亭

瑟瑟寒風細山亭覺更幽泉聲鳴歲月石骨老春秋松雪和  
雲落人烟隔渡浮深懷慙杜甫時共廣文遊

許

字延闕號廣菴如臯諸生忠愍若魯孫飲量甚宏一斗一石能爲長夜之飲董大令琴菴嘗以醉虎

癡呼之著虎癡齋集

春日送琴菴董夫子舟次吳陵同倪永清黃交三江岷

山有聲作

揚州何處是聊宿海陵城春水連天濶晴雲帶雨輕今朝杯



共把明日路長征從此無知已沙鷗好結盟

和先王父忠愍公遺詩

長空雪淨日孤明三尺昆吾馬上橫誤用荆卿爲刺客燕丹原是不知兵

劉

靖

字阮仙九臯子著太乙閣詩槐蔭堂草

泰山墩春望

晴光漸入杏花天抖擻探春上絕巔雪岸亂流歸壑水寒峯初散隔江烟帘搖疎樹村中市網罟斜陽郭外船安得雲溪北麓下貫休容我共臞禪

孫

燕

江都諸生豹人子

文游臺

孟城城北有高臺憶昔羣賢並轡來秋水連天漁艇遠殘陽

柳樹酒旗開疎狂偏動坡公興詩句爭傳莘老才試問於今誰得似行吟溪畔幾徘徊

郭朝松

字念祖號少庵江都貢生士瑒孫稟家學未弱冠卽有聲文壇著少庵存稿

湖上

短篷軟浪雨霏霏翠竹臨流放鴨歸水滿汀洲花滿岸湖天一色鷺絲飛

吳爾瑚

字夏宗如舉人詩見昭代詩存

中秋夜泊舟海陵

秋來愁作客此夕更傷神儒術多艱日天涯一病身雲開隨野濶波靜映舟明偏憶家園內稱觴慰老親

吳燧吉

字漢昭江都人煜吉弟

春日同兄晚楓登平山堂

六一高風誰與攀  
堂開青送隔江山  
烟花六代銷沈盡  
堤柳空餘鳥往還

劉梁楨

字玉栗河律人江都籍  
著柳縉集稱言齊稿

眞州江上逢故人

片帆乘夜發涼月渡頭昏  
漁火明沙岸江流繞郭門  
飄零長鋏在耆舊  
幾人存山色依然綠相逢倒酒罇

吳崇先

字式武號鶴山泰州人鄧孝威謂其詩格  
力適上字不虛下著世綸堂稿桂籍軒詩

題宮紫陽年伯舊山讀書堂

東風吹柳綠湖濱竹石參差野鶴隣  
新雨一簾催曉夢故山萬卷對殘春  
林邊遠見髯公杖澤畔長垂漁父綸  
眼看十年鋒鏑盡科頭抱膝是先民

王肇修

字初士  
儀眞人

廿四橋

橋鎖東風跨碧波  
簫聲淒絕月婆娑  
可憐歲歲潮邊水  
流入離宮淚較多

黃鸞和仙裳孫

浴沂亭

沂水空濛入晚晴  
芰荷香氣上軒楹  
披衣還向亭中坐  
雲傍遙山鎖處生

王尊德字高郵人

高郵水碩金別駕也

馮夷爲災災最酷  
捍禦賴有賢司牧  
吾郵今日稱樂郊  
當日幸免填魚腹  
丙子之秋水溢城  
時余作客留燕京  
傳言淮南盡漂沒  
夜眠數起心魂驚  
孟冬匆匆買歸航  
抵家水勢猶汪洋

洋骨肉牽衣歡聚首夜闌秉燭話更長爲言七月廿四夜颶  
風如山雨如射城外人家隨逝波城裏人家俱傾卸居民舉  
室城上遷架竹編籬帶濕眠鳩形鵠面半人鬼哭聲直與水  
聲連繞城長堤堤盡倒瀾漫百里無寸草狂瀾澎湃東西奔  
三版不沒真難保南北建議築水門北城方閉南城喧隨閉  
隨開潏震蕩倉皇持論託空言金公慷慨身不顧往來指示  
皆徒步勤勞不暇歸署中直立城頭夜督工八月一日暴風  
作波浪較前勢逾惡束手坐視事何補難俟金錢頒 內府  
毅然傾囊濟急需募招人夫勇如虎電發雷興指顧間須臾  
保全十萬戶我爲邇人重感泣首戴皇天履后土年來鼓腹  
樂唐堯平成奏績過神禹斯圖允足誌深恩監門鄭俠不足  
數君不見漢王尊魏李崇禦水救民如我公公當與之爲鼎

時聲華千載傳無窮

秦 覺

字序堂號西岩晚號石翁江都人乾隆壬申進士官編修已卯主廣東試庚辰乙酉主山東試辛巳

癸未丙戌會試同考官壬午順天同考官改御史劾部曹在任守制二人外轉湖南岳常澧道告養歸卒年七十三門下士董桐國蕙林表其墓著石研齋詩鈔于恩復乾隆乙未進士官編修

西湖

但說梅花思處士纔看孤嶼憶逋仙  
山容久與梅同瘦白鶴不歸幾百年

寄諫泉

舉頭驚雁影昆弟最關心攜手尋芳遠  
連床話夜深潮平雙鷺振風急亂蟬吟  
目斷秋江濶音書莫漫沈

舟次宿遷與胡對山話別

不忍遽分手臨岐感倍眞  
西風偏折柳細雨正依人  
此地一

爲別重逢何處春蕭蕭班馬去遙望劇傷神

天柱

一日雪山以飛瀑得名

巉壁真如削巋然結銳巔四時都是雪一柱獨撐天勢踞院  
瀟上根同衡霍連何緣採幽露碾月酌飛泉

天柱茶最佳

敦素堂

鑿溝偏遇湛伐薪多逢虎人事本不齊幻境難逆覩素履呈  
初九敦復占六五無咎與無悔易理貴細剖不聞蜚廉馬勞  
逸古自取願爲四可吟勿作中夜舞俯仰空庭間寸心足干  
古

居竹軒

杜老憩息地必種數竿竹廷珪署所居遺趾不可復

居竹軒乃元成

廷珪先生居廣陵所署之額也軒成對此君佳名偶然續稚笋已排牆清陰

遷覆屋好風延故人飛雨拭新沐吟成興未孤客至多不速  
卽此足卑栖胡爲紛棟樑

百餘年老屋日就傾圯不可復居茸而新之各署以額  
并系之詩示兒恩復

靜思堂

陳蕃大掃除一室任蕪穢仲蔚掩衡門日與蒿蓬對獨笑驂  
退之有屋誇兒輩娛樂竟綦粲炫耀及王珮豐屋部其家靜  
觀理不昧思思已爛熟心空無滯礙達者陶淵明吾廬吾亦  
愛

舊城讀書處

舊城讀書人

召對荷

上問曰汝揚州人揚州

上曰舊城多

溫綽銘肝膈屋偏西南隅近郭門巷僻白首抱

淮海英靈續集

庚集卷一



遺經落窠子雲宅跌宕圖史中韶光敢虛擲檢點先世文編  
輯重手澤時督子姪課書聲朗朝夕  
王言實式憑違  
顏不咫尺

宮國苞

字霜橋泰州監生羣雅集云霜橋工詩善畫與州人仲雲江葉古軒鄒耳山羅夏園輩結芸香吟榭

霜橋司月旦二十餘年在都門英文肅重其才與丹徒張布衣石帆並稱江上二詩人著半紅樓集與國朝名人詩名

霄崢集

寒夜宿姚司馬官署

一天寒月照冰池偏是勞人睡獨遲野寺鐘聲官閣鼓十年  
聽得鬢如絲

落梅

一樹橫斜隔水濱東風吹散豈無因收殘香片剛逢雨辱到  
泥塗爲占春鶴去樓頭繞弄笛琴橫竹裏不逢人江南三月

凡桃李好借餘芳布錦茵

七夕感懷

一水迢迢外烟波有故居寄書遲塞雁歸夢感江魚落寞情  
偏愜飛騰願已虛天涯涼夜永清露濕衣裾

齋居偶成

世路經過合閉門細將物理自評論花富富貴難全福人到  
饑寒易感恩三徑草荒無過客一池冰結侍春溫空山落寞  
誰知己只有梅花月一痕

棠湖晚泊

湖波清且深晚泊近沙洲雙雁白浮水一花紅爲秋年華消  
客路生計羨漁舟待月沽春酒長吟破旅愁

秋夜懷范松亭司馬

煩暑因風退新涼人夜深夢殘孤燭影秋緊百蟲聲落寞無  
新意飄零感舊情相思隔天末官况水同清

珠溪道中送黃小松歸江南

相思相見總生愁况是河橋欲去舟如此垂楊如此別銷魂  
何必定揚州

友人歸自塞外喜而有作

白草黃沙出玉門忽傳

天語降春溫三年遠戍違親

舍萬里生還是

主恩窮入邊詞無怨調磨殘衣線有

啼痕文章福命都休論且與琳宮發酒尊

題儲玉琴畫溪春泛圖

青山面面翠沾天佳處憐君未買田兩岸桃花紅欲雨一溪  
春水綠成烟美人消息吟香草詞客生涯託釣船我有先人

耕讀處不扶歸棹十三年

秀弟久客京師余復浪遊東海寒窗夜月蕭寺無聊作  
此奉寄

花前分手記春殘冷月珠林悵獨看千里關河孤夢遠九門  
風雪一燈寒年衰荒海謀生拙米貴長安作客難兩地相思  
隔天末尺書珍重勸加餐

宿柳村郊居

迴環溪上路幽寂四無隣水竹宜調鶴烟霞能壽人酒香剛  
卜夜花氣不關春一室聯床處渾忘話及晨

徐邦殿

字碩夫號芎園如臯掘港場人諸生官南昌縣尉

與江片石李漁衫周陸舫宋杏原黃楚橋良男輩  
絃詩鬪酒蟻山風雅稱盛一時著留香草  
堂集配李澹卿亦工詩畫著遠山樓吟稿

聞江樵所訃

應詔飄然赴玉樓陳情有表竟難求

聞易簣時上帝徵爲  
仙吏樵所表以母老家

貧爲詞帝  
皆不許

始知修短渾無定天忌才人到白頭

雨中同陳石橋用工部韻

不住深宵雨聲聲欲白頭功名拚病骨兒女逼窮愁半世水  
同逝一身雲更浮遙天聽孤雁辛苦在高秋

過吳氏別塾問鄭南羽病

客有尋詩約城南任往還小橋流水路荒寺夕陽山引我晚  
涼處叩門深樹間主人不相見茶熟出雙鬟

寄懷江片石

片石圭璋重遙憐舊獨遲功名雙鬢雪涕淚一囊詩此別亦  
已久相逢知幾時故園杯酒會念我在天涯

席上送李振祖北歸

木葉落將盡蕭蕭風更吹故人多病後萬里乞歸時骨削做  
猶在官貧廉可知漫勞尊酒勸索我贈行詩

直北少舟楫長途信馬馳艱難羣僕散衰老一身危此去歲  
云暮有家歸已遲丈夫重意氣莫漫惜分離

內人攜兒輩來署

冷署足高臥窮鄉多此官爾來千里易俸養一家難山台見  
天窄谷深知水寒何如株守日窗下着儒冠

水月閣晤易九

蕭蕭古寺傍荒城茗椀爐烟語舊盟傑閣飛檐明夕照晚涼  
高樹作秋聲事非有策愁何濟貧到無家累轉輕奈我客囊  
太羞澁一尊難盡故人情

擁翠山房感舊同李漁衫分韻

茅檐竹榻夜相親酒滿尊前未入唇情到難忘談更熾事關  
有恨記偏真青袍漣濕添新淚白首逢場少故人輪與孤鴻  
能奮翮天涯何處着吾身

得楚橋書次黃良男韻

天涯何處卜安居未得依人得自如爭似柴灣村舍好半窗  
燈火課兒書

程名世

字令德江都人儀徵籍職監生著思純堂集王柳村

導其牛路窮之者程午橋史焦隱顧書宣及令延魚門而已先生性爽朗好賓客如阮董浦王梅泚皆主其家人或以貧乏告解衣推食終身無倦容坐是傾其囊橐者嗣中之年泉壚才譽定甫爲名翰林官侍御直聲著中外以思純堂集屬還訂孝思洵足風矣

過錫山有懷華半江胡壽泉

遶船沙鷺飛導我過嚴扉秋淨山容瘦峯高樹影微何年結

烟舍於此對清暉卻想棲遲者風塵未息機

登韜光絕頂

看竹疑無山入山山抱竹寒泉竹裏飛聲響振巖谷日色不到地冷翠沾衣綠松門出中峯登頓造雲簇更涉最上層江聲寒佛屋迢遙望沃州聚米紛在目海懷與霞想始覺身局束  
東來未可期且傍香燈宿



惟海英靈續集

鄉人阮亨輯

官夢熊

字宗憲泰州人康熙癸未武進士官侍衛以刑部郎中陞純孝母及三年一依喪禮鄉里奉爲矜式

湯山應制

曉隨仙仗出

楓宸律轉陽和景物新豹蔚膺揚齊輔翼山

瑤海翠供

時巡龍騰靈液春波潤人沐殊恩

帝澤頻何幸微臣沾

雨露獻詩獻祝效堯民

蕭

晨字霽藏江都人工畫山水與石谷相客麓臺三王并爲世所珍

允叔招集帆影樓觀菊

籬落淒霜露伊人感物華綠樽移晚席名士譜秋花窻俯長

河水杯浮赤岸霞可知陶靖節托興在田家

余光紀

興化人

平山堂春眺

吹簫還憶橋邊月汲水新烹雨後茶最是東風惆悵處玉勾  
飛散白楊花

蘇

宇

字邁園江都貢生陳意超云字詩見素敦夫太史廣陵詩存

送汪悔齋太史出使琉球

侍臣聲望重朝簪

綸綍親承到海南萬里長安瞻斗柄

一帆孤嶼指晴嵐迎來烏雀隨星旆舞罷蛟龍隱月潭八景  
會須題詠徧問誰能屈摯虞談

王

鋒

字沐橋號靜齋高郵人

送友人歸里

忽忽歲華晚送君歸舊林離情隨路永愁緒隔年深冰雪催  
孤棹風霜壓短衾高堂正懸望好慰倚閭心

劉懋賢

字思公泰川人

春雨草堂

別業橫塘曲相招野鶴羣塢深天失曙林迴葉留雲細雨迷  
花氣微曛淡水紋偶然鼓瑤瑟烟際下湘君

李

湘

字培源江都人官霍邱教諭著於斯堂詩集王屋  
云廣文官霍邱值歲饑奉觀察令往賑孟家諸集

賣力給散并捐俸佐賑全活無算民皆感激持  
大竿懸旂幟立學官之前以彰其德羅拜而去

登瑯琊山

瑯琊山色古開闢始何年白接雲邊海青扶谷口天齊封空  
浩劫秦碣卧蒼烟落日荒臺上西風暮颯然

李

潤

字朗王  
興化人

關嶺道中

何處泉聲落千巖晝亦暝山腰飛露白樹杪接天青古路防  
豺虎空村叫鷓鴣途危驅馬瘦愁思動春星

李

浴字子興  
興化人

前村

落日前村外天寒嶺早收  
幾烟連塢隱暝色帶山幽  
樹老前朝寺花殘舊日樓  
蕭蕭北原上風物總關愁

桑應張

字樞左江都人詩  
見萍水聯吟集

和張良御太史會葬詩人閔賓連

一邱聊爲慰吟魂眞賞樓前得墓門  
白骨祇今留宇宙黃蘗自昔淡褒殮  
賢豪感舊交情重慷慨揮金古處敦  
天下從茲知友道紛紛輕薄不須論

郝

琨字彥昭號瑤圃江都諸生乾峯民部孫家有世美  
堂額爲沈蛟門相國書沈爲諸生時留館其家

吳蘭次先生薤薤舸分韻

謝公高致寄東山晨夕招攜共往還  
一斗不辭鸚鵡杓半鐺

常煮鷓鴣班青燈促膝聞今雨白帽握衣拜古顏莫負鶯花  
三月信好將奇字叩松關

賈兆鳳

字九儀號檀村良璧子康熙丙戌進士官檢討王  
又村云九儀與兄國維分修大清一統志新

城尚書見之曰此良吏才也老人耄矣任一代掌故者  
非斯人其誰性素孤介在館閣中勤慎自守朝衣動入  
質庫嘗曰翰林清  
衙有錢不稱矣

詠菊

香山頗耐潯陽卧司馬嘗甘嶺鼻貧祇爲買花錢不得終年  
自作灌花人

劉中從

字自益號竹峯寶應人康熙  
舉人官石埭教諭善所好軒文稿

雜詩

老來人事稀閒居多幽思池水綠漪生悠然春已至日暮竹  
簾風坐對林花墜

范

邃

號密居如皋人拙存長子陳恪勤稱其芳薌雋永  
令人神越意消論者偶之以玉臺西崑固其宜也

上漁洋先生

四海傳來無盡鐙龍門百尺舊難登  
人知溢水航推獎早有虞山識  
代興細雨劍門人淡淡紅蕉百粵嶺  
層層鱸魚楓柏詩中畫多少丹青上  
柿綾

葛宗芝

字楚秀江都人著僅存集

孤雲

孤雲亦無聊斜日無歸處  
下窺閒潭淨欲與影相聚  
著水濕難飛將逐流光去  
松風吹不高空濛溪上路

顏長愉

字介夫號秋水興化人王通敏云秋水冲然孤矜  
論詩文非出高士罕當其意嘗曰人品不足著作  
未可問也學守程朱特有真儒之目著涉園近集

過貢三天印山居

山深不見人茅屋蔭林樹川濶往來少一艇橫遠渡杳然谿  
壑遙柳村更花塢願言此卜鄰謝彼塵泥路那希與葢榮弗  
辨錙銖數負我敝篋書歸來未云暮

劉懋勳

字堯叟  
秦州人

九日登文星閣同梁園田雪龕使君

清飈動令序澹景薄林臯眷言托君子懷古企賢豪振衣陟  
崇臺落葉盈綈袍憑欄舒遠嘯短髮故蕭騷芙蓉媚修渚烟  
波蕩輕舸田廬欣銍艾平疇輟桔槔嗟彼行役者終歲馳蓬  
蒿中原猶戎馬江介紛旌旄少府急金錢籌畫亦何勞何如  
躡層嶺擊鼓酣醇醪延眺極城闕庶以散鬱陶

蘆溝橋曉發

不作長征客安知遠道情寒風吹雁疾朔氣壓雲平路入殘

星暝橋連積雪明卹堪三輔地野爽隔林生

南歸留別家介公兼呈農部旋九叔

三年欣握手重別又殊方羈旅驚春盡鶯花引興長自維兄弟好轉惜鬢毛蒼無卹仲容劣飄零只客鄉

周櫟園先生重過吳陵招集諸子

邗江持節當年地白舫重來鬢半斑真氣迎人心欲醉清言滿座暑全刪風霾曾灑孤臣淚潮解今逢故舊顏聽說射鳥樓畔事如公豈合老東山

王阮亭儀部招集京邸賦贈

詞源歷下傳名久況復風流接建安簾捲燕山深對雪樽浮薊酒碧生寒開囊舊讀漁洋集學步將窺王李壇試看賓朋梁苑盛何人不倚切雲冠



繆

芥

字公炎號若菴如  
阜人著若菴集

寄家念齋殿撰

夔龍何事戀林邱高寄長懷物外游  
吳苑鶯花晴倚杖太湖烟月晚移舟  
榮名久已騰金馬逸興偏宜對野鷗  
聞說綸扉思欲沃東山未許謝公留

朱文心

字拙菴通州  
籍吳縣人

匡廬山人歌送胡二樹孝廉歸江西

廬山之高高入天孤峯秀出眞青蓮  
峯懸石鏡何年影照盡彭湖三萬頃  
平開雙闕赤霞浮翠嶂丹崖萬木秋  
飛濤倒瀉銀河水灑入長江九派流  
青山亦不摧流水亦不絕謝公行處  
空雲烟東林舊跡莓苔滅廬陵胡生  
才且雄匣中寶劍雙飛龍拂衣欲出  
人間世走臥匡廬第一峯香爐雲氣  
飄山閣

明滅千巖與萬壑雨急朝聞嶺上猿月寒夜聽江臯鶴有時  
挾策薊門遊俠骨嘗輕萬戶侯上書北闕不待報笑臥吳  
姬舊酒樓壚頭日高歌管歇楊花茫茫春雨雪此時彈劍却  
歸來脫帽長吟舞秋月胡生胡生無與倫心雄萬夫步絕塵  
英賢古乃起屠釣何況儒術逢昌辰彭蠡爲君腸瀑布爲君  
口俯瞰洞庭波吸作一杯酒但欲澆爾胸中萬古之壘塊風  
塵蹴躡吾何有胡生胡生何時與爾同上匡廬巔足躡星躔  
禮南斗

里居送黃仙裳北上

豈緣多病壯心銷敢向清時遠市朝憶昔倦遊淹歲月只  
今歸夢落漁樵孤雲獨舉依蘭棹別酒初醒見柳條可惜河  
梁分手地桃花潭水碧迢迢

馮蕃大

字孟庶  
興化人

秋曉

殘月下簾前疎星落酒邊  
秋風鳴敗葉曉露咽寒蟬  
竹色侵詩卷波光拂釣船  
晨興呼素侶拚醉菊花天

昌

綸字淵若坦然  
子著芸室稿

春曉過匡峯廬

橋通山勢起石出水痕乾  
細草生春色輕烟作曉寒  
花繁疑徑小地僻覺懷寬  
且盡登臨興雙眉不用攢

賈

軒字執衡此度孫寧人  
趙琴士云執衡自曾祖  
仲若遷居江都執衡仍歸蜀  
應試中式新繁

紅橋柳色

畫舫春歸酒易消  
絲絲牽恨說前朝  
剪刀風裏初開葉  
魂斷

揚州第幾橋

李思訓

字于庭興化籍句容人

閩溪

溪迴曲曲擁層螺積石中流折作波山合祇疑無路轉榔鳴  
始覺有船過海魚村店聞腥滿野竹人家接溜多薄醉短篷  
堪聽鳥深林時度管絃和

李

驥字西駿興化人

昭陽墓

高原突兀倚晴空楚將雄猷想像中芳草離離嘶石馬幽宮  
寂寂冷青楓碑荒苔臥龍蛇跡地僻春暄燕雀風鐵騎雕戈  
今不見忠魂千載化長虹

朱廷宋

字嗣殷號質存鳳台子貢生官宜川縣佐王又村云廷宋與兄廷宏字父定號畏庵官福清縣丞廷

客字我嘉官六安學正弟廷密字勿齋官沐陽教諭廷宥字緝基貢生俱以詩名

旅里

高柳柴扉水一涯  
茅茨依舊宿烟霞  
十年鄴架孤燈夢  
一去秦關兩鬢華  
雨過有詩成小草  
春殘無語怨飛花  
歸來惟有門堪杜  
滿目雲山不待賒

張

槎字漢乘號秋水如皋諸生松友子著春秋軒詩文集

送家大伯歸東臯

署中何所事  
日日送歸人  
薊北已無客  
江南尚有春  
但教歸只健  
何礙老還貧  
燈下憐兒女  
回頭一損神

徐

啟字湘陰通州人

留贈范性華

梅綻寒輕二月天  
平山堂外正流連  
那堪暮雨蕭蕭裏  
酒散旗亭客上船

朱

濤

字雪山號松  
餘寶應諸生

客夜

露白霜初結更深漏欲殘驚心秋又晚小閣夜生寒空有還  
家夢誰憐客子單披衣趺坐久北斗下欄杆

朱之璣

字海若號懷堂寶  
應人官壽州同知

公安縣

亂山圖一縣城郭在山腰蜀水全歸楚居民半屬徭奇峯懸  
似屋古樹卧成橋野曠人烟少秋風正寂寥

何龍光

字大山泰興人王式丹云何子負不羈之才嘗獲  
被游萬里外其詩平淡不涉于俗精深不涉于巧

何其  
工也

獨立

野草淒寒綠霜林逼晚紅村荒秋雨後山亂暝烟中送鳥歸

寥廓懷人向遠空偶然成獨立俯仰意何窮

病中朱宮聲悵別

病卧門常寂何期來故人三年頻悵望一見各酸辛無酒空  
成別看花却負春羨君裘馬意不憚逐風塵

陸引年

字爾仲蘭州人江  
都籍著寒山集

梅花嶺

春日徧隋堤孤城壓嶺低荒原從馬踏古木自烏啼月落梅  
魂杳風吹樹色迷孤忠埋碧血化作草淒淒

高獻可

字展歲號介橋泰州  
貢生官柳州通判

長沙換舟

年少深慚祖逖鞭一官匏繫劇堪憐驚過殘歲仍新歲憶上  
吳船又楚船曉渡暫辭雲夢樹暮帆猶帶洞庭烟長途況味

經來慣柔櫓聲中睡正便

許信瑞

字舜符  
江都人

秋日集員氏水榭

不負登臨約還如秋禊辰松聲疎似雨菊影澹于人醉把青荷葉涼欹白氍毹巾高陽徒侶在泥飲不辭頻

沈晦開

字亦季  
泰州安豐人

懷吳長吉

見說君歸後此時殊不閒一燈生遠夢三月在黃山芳草忽然碧故人猶未還荒村花亂發香裏掩柴關

潘西鳳

字梅橋  
江都人錢塘籍

秦中歸將之天台省墓留別揚州同學

萬里秦歸客邗江歲又更喜逢黃鶴侶來訂白鷗盟萍水朋



簪合仙人玉洞清詩成霞外賞月旦許誰評

潘龍翔

字瑞宮西鳳弟

送家兄西鳳省墓天台

一池春草動離愁魂夢隨行到故邱須念倚門頻悵望西湖雖好莫停舟

郭延齡

字香山江都諸生曾祖梁樂善不倦父光號自瞻貢生讀書廟行生子五人長卽延齡次彭齡號商

山舉人次鶴齡號雪山拔貢生績溪教諭次嗣齡號玉山進士次九齡號乾山諸生並有文名時稱郭氏五山

送唐石郊

早聞姓字滿燕京擊楫中流錦浪生江左才原推巨擘洛陽紙合重連城班荆綠野誰賓主分餅紅綾又弟兄捉鼻幾會能不免送人作郡畏通名

張

汧

字禹導號艾陵江都人太平籍

輓淮陰死難諸客

絮酒悲風冷傷心難具陳國殤何所恨端不愧三人

江大鍵

字葑船如皋貢生工詩文與兄樵所稱二江先生其遺稿爲門下士徐珠所輯名南村集

讀騷

美人遲暮誰知恨芳草蕭殘不忍馨客正悲秋如宋玉魂來  
彷彿夢湘靈

宿雁

菰蒲幾夜委霜雪空塘凍淺昏孤月風急天空何處飛沙汀  
無侶自悲棲岸頭古樹巢高雀猶自驚寒夜半啼

繆肇祺

字介茲泰州人博學多能昔人以應詔達策彈琴賦詩爲難兼之事而介茲旣登高第復善雅流與

羣從極唱酬之樂

盧溝蚤發

燕趙悲歌朔氣寒  
拔裘十月買歸鞍  
霜飛匹馬旗亭酒  
月落荒雞野店餐  
千里雲烟迷故國  
百年棋局夢長安  
綏回射策金臺畔  
一笑臨風振羽翰

王元臣

字漢標號鐵夫江都翠屏洲人監生年十三念父

並焚諸通者券歸里曲盡孝養時呼爲小孝子性慷慨  
好義如修橋施棺恤孤憐寡之事靡不爲也如營馬踐  
禾苗落地稅之害又力請除之瓜洲彤雲閣爲名流嘯  
詠之地將圯獨力修葺晚年督孫豫讀書甚嚴故豫早  
年負文譽詩不多作間一擲管迥非俗調道光二年奉  
旨旌表孝子子安福號康齋監生好善有父風  
秦太史敦夫等請于有司祀之本洲同善堂孫豫附監  
生道光二年徵舉孝廉方正山林隱逸皆以母老辭會  
孫屋廬敏俱請生負詩名

種竹

子猷愛種竹其節與之同可折不可辱良慕君子風心不出

竹外身常居竹中

南溪

朝行西溪灣暮到南溪頭  
兩水夾一岸溪水入江流  
春風溪上生春雨溪上收

登瓜洲形雲閣

予自漢上歸頗遂烟霞癖  
茲閣殊宏敞登覽常日夕  
吐氣澹高秋野景多奇獲  
松濤雜龍吟江流翻日赤  
金焦俯仰間翠雨江飛碧  
昔者王光魯易蔣流私淑在夙昔  
陳跡隨荒烟斯文通一脉  
月墜滄江空撫劍長太息

題趙外翰偉堂鳳石齋

外翰于郡學土中得  
朱鳳碑因以名齋

地擷南徐秀山環北固雄  
高城連海氣虛閣納松風  
鳳鳥今仍見麟碑況與同  
幸留騷雅在情愜酒杯中

慰夢樓下第

下第南歸日尋予秋水間及今逢

聖主莫卽愛名山

霜漢翔文鳳烟波下白鷗著書他日事且暫慰慈顏

雪後望金山

山抱翠屏開金鰲水上來雪痕明遠岫塔影落空杯除夕詩  
空祭春風香到梅升沈故人感獨對妙高臺

寄懷張大令紫峴

文章楚國負高名施

小鐵

紫

正衫

交遊重性情遠道山川勞

別夢扁舟江海送秋聲杜陵白帝思何限司馬青衫淚正橫  
遙憶西門舊柳色不堪獨臥武昌城

贈友

行李蕭條畫益工淮陰市上漫相逢問予蘆荻家何處萬派  
春濤鎖碧峯

王哲

字幼濬  
寶應人

遊真州榮園

謾謾松杉靜裏聞  
繞迴巖岫徑金分  
亭荒久失遊人跡  
樹老惟存宿鳥羣  
寂歷澗邊尋野水  
蒼涼石畔悵斜曛  
名園凋落滄桑後  
引步惟添愁緒紛

王恪

字子山  
幼濬弟

廢寺

薄暮來荒寺  
蕭條不可尋  
徑封青蘚厚  
門鎖白雲深  
老衲忘寒暑  
空山閱古今  
晚風吹落葉  
片片下空林

黃霖

字雨相  
江都人

吳陵春雨

客思吳陵好  
相逢盡故知  
雨聲寒食近  
夢入落花遲  
小圃浸

溪漲新鶯動柳絲春光過已半卮酒莫輕辭

旨

泰

字思亭號安止諱少元孫心田祖  
官思州經歷著熙游集雍陽學詩

題南村先生幽居

綠樹發華滋青山涵古色白雲出無心變化常不測欲問幽  
居人杳然不可得

冒國柱

字芥園如皋貢生  
著萬卷樓詩存

讀江片石詩

濕盡青衫淚暗流曾無一語不悲秋飄零莫問香山社剩有  
人問兩白頭秀水徐荔村卽山廬宴集詩九人共結香山社  
與家弟栢銘俱歸道  
山惟余兩人尚存

客歸

柴門落日噪歸鴉行李蕭蕭正到家嬌女不知鬚髮改誤將

衫袖拂霜華

汪

棣

字韓懷號碧溪又號對琴儀徵附監生官刑部員外郎著持雅堂集羣雅集云對琴溫醇怡曠命筆

微吟濯濯無俗調述庵先生

予告出都道由邢

上對琴邀同沈既堂都轉紅橋泛舟談藝竟日疏通微言剖析妙義真

前者風範也

同史蘭浦華半村過平山堂

輕颺天宇淨艇子泊禪扉松色暝逾鬱蟬聲涼欲稀平橋餘日影曲沼散荷衣喟誦一時歇依依不忍歸

彈指閣月下

精舍夕欲涼前除忽已暝客從林下來襟上有清影徙倚孤閣外亭空足烟景露白光已寒修廊夜方永忽聆一聲鐘皓月在松頂

吳之補

字有食號竹屏江都人官至江西按察使王又村云竹屏善畫蘭竹書法絕倫吳興官閩中搜羅碑



碣石編歸田後坐小閣摩挲跋尾有趙  
明諤之風著樂山堂詩集孫菴山工詩

題杜補堂太守野寺尋碑圖

太守賦歸田就養去衡源道過寶曇寺側于榛蕪中  
得明末卜將軍墓碑將軍以闖逆攻汴力竭城破死  
最慘烈後人殮尸以葬史館不得其實幽光未曜墓  
碑埋沒于荒艸間者百有餘年矣杜公急完其石樹  
之道左命羅兩峰繪圖自爲記並係以詩將軍諱從  
善

故明末季卜將軍以忠死賊衝河濱裹尸藁葬寶曇寺樵牧  
爭逕牛羊羣苔積塵埋碑石斷將軍姓氏湮無聞吾鄉杜陵  
老詩叟表忠汲汲惟恐後尋碑落日手支筇古墓荒烟詩在  
口繪圖火急倩羅生要籍丹青垂不朽吁嗟乎當時甲第何

紛紛完膚不復有完人讀詩看畫重感歎異代名傳南霽雲

劉玉磨

字又徐號璧齋又號春浦寶應貢生官爵林分州軍功加接經衛習辦班師事病瘴沒于百色舟中

蔭子典主簿工詩尤精攷據著爾雅補注粵西金石錄惜未卒業有贊齋遺集

聞破亞稿寨諸爲賊脅從者乞降

兩軍破砦防嶙峋諸寨紛紛解白巾馬上遙傳歸命語陣前誰是受降人恨從雍閩歐爲賊急向垂崖乞作民那不揮戈

賊爾盡

皇心仁似上天仁

趙一歸自貴州銅仁詢軍中事

聞說苗頑待整兵喜君歸自夜郎城直探虎窟羞攜劍不學龍韜願請纓風展一旗初有令燈懸千帳迥無聲將軍誓欲

殲餘孽

聖主承天

詔好生

聞徵鎮安兵赴西隆州

沙上萬人立軍前一騎來兵初撤關隘賊已戰城隈密雨淒  
難斷沈雲鬱不開幃騰就刀斧天地亦流哀

歸德峽聞鷓鴣

帶雨登崇峽迎風下急灘蠻天雙鬢老戎馬敝裘寒忽聽呼  
兄切重言行路難徑思脫鞅去只待斬獬獬

任木齋爲述夢征黔苗作

風雨空堂酒未消聽人談笑說征苗夜來夢過黔江去立馬  
橫刀鐵索橋

贈任都閫

虎帳譚兵靜不驕當年辛苦事班超雲埋馬足朝乘棧雪滿  
盤叢夜破礪西洱近聞誅黑獯南籠又說煽頑苗誰教百戰  
沙場客坐守山城驛肉消

白連鍾

字天閑江都貢生陳梅緣云明經與鐵甫孝子友善授經軒中景久柳村徵君其門下士也

種竹軒贈王鐵甫先生

子猷倦游歸手種千竿竹竹外抱青溪竹中構茅屋曉風動  
天籟衣上流新綠下榻聞三載消受幽居福欣君膝下孫清  
才定拔俗謂柳村

苗

莊字敦甫寶應諸生著南遊集

吳興將歸留別表姪王義銓

吳興官舍久淹留異地逢君快壯遊  
意下已眠徐穉榻湖邊又上李膺舟  
三更醉酒嘗連曉五月看花直到秋  
若得腰纏再檢點明朝有鶴上揚州

曹

照字光四江都人變齋長子

紅橋春望

長堤一帶草離離春滿揚州二月時愛煞畫船歌調起綠楊  
陰裏唱楊枝

史慶義

字篁谷  
江都人

仿園倡和詩

集唐

冰雪淨聰明

杜甫

韻高無俗情

韓偓

烟霞多放曠

孟貫

詞氣

皓縱橫

杜甫

石上題詩處

李願

花間笑語聲

王維

羨君無外

事鄭常

我亦舉家清

李商隱

朱

紫

字雲卿號西柯江都人謝  
佩禾云卿雲書法唐人

平山堂讀歐蘇壁間詞有感

勝地招遊過羣賢拾級登江山仍慶歷風雅憶廬陵倚檻看  
飛鳥聞鐘識定僧遙天堪送目更策一枝藤

顧符稹

字瑟如  
興化人

清潭舟中和孫樹百

頻年壁馬襄湖東渺渺雲濤接遠空好值鶯啼花發後相逢  
風雨片帆中

江

干

字片石號黃竹如舉掘港人貢生詩多苦調誦之  
懷婉真窮而後工之言也淮海詩人以布衣稱者  
五十年來惟朱二亭宮霜橋

與片石而已著片石詩集

謁文信國祠

舉朝銀絹議皆同未許提刑有戰功滿意連軍和兩閩傷心  
遺寇辱三宮已經白雁來江上猶盼黃龍見海中臣節不隨  
天運改日星耿耿照長空

看殘菊留別同人

問誰花肯愛將殘獨向樽前仔細看一去又成經歲別重逢  
猶似故人寒地無塵壒投閒好天有風霜寄傲難且與流連

終此夜片帆回首路漫漫

劉南廬墓下作

陳熟之按墓在紫琅山下

謁來楚客酌芳樽自昔難招是怨魂寒食年年誰上塚一編詩草當兒孫

成闕草堂

五峯曾此倚樓窗廿載重來夢已闕貧到依人交更寡老兼失意別尤難菊花情性霜中見碁局生平劫裡殘自後相思莫相棄古來唯有布衣寒

西施

如此紅顏萬古稀君憐君寵未全非屬鏤一劍能亡國不在深宮閨舞衣

虞姬

項王淚盡一歌終  
帳下驚看劒血紅  
事去英雄變兒女  
命輕兒女作英雄

宮象宗

字友達  
泰州人

歸燕

秋老難爲客  
愁看社燕歸  
呢喃如惜別  
來去信知幾  
刷羽甘清露  
辭巢正落暉  
明年春色好  
還傍舊家飛

九日卽事

飄零書劍在天涯  
九日烽烟苦憶家  
一望荒臺嘶野馬  
愁思吹斷暮天笳

江岸

字道先如皋諸生  
著桐陰村居集

擬古

皎皎一亭月  
密密一林霜  
人生容易別  
不如夢中長  
夢中可



以去夢中可以住有時乍相逢反作夢中晤

憶母

小人有老母鬱鬱在北堂我爲貧所累旦暮各一方朔風何  
凜凜寒氣侵衣裳我寒我自覺母寒我豈忘我寒母應念母  
寒母自傷空懷陟屺心陟屺徒相望

裘肇鼎

字定年江都諸生著浴  
思草堂詩天中遊草

山行

靈境不易逢澄懷澹壓慕烟雲無已時山光自如故遙青三  
四點出沒屢回互隔岸桃花林漁舟停野渡茅茨隱樹間錯  
落成村聚明年擬卜居來茲諒非誤夷猶動晚鐘羅月候歸  
路

秋燕

秋燕何爲者栖栖未肯歸似愁經歲別故作近人飛辛苦諸  
雛長飄零舊壘非不堪王謝宅回首但斜暉

黃上舍證孫齋頭見阮大鍼所製傳奇感題

何代銷魂曲南朝玉樹花軍書馳白羽樂部按紅牙往事同  
哀郢殘編感夢華寒烟江令宅啼殺秣陵鴉

李商山

字芝田號逸亭江都人幼孤事母孝篤行好古事載郡志子周南進士官刑部主事

夜讀

古人不可作尙友在詩書警欬恍如接襟懷我獨攄名言足  
千載至味磨三餘寒月來天際清光照敝廬

程日葵

字心日江都人著懲室堂集

孔水洞

淵明記桃源妙境疑游仙地僻罕人跡卽此別有天翳彼孔

水洞曠廢幾何年  
隱約在人世而無車馬喧  
浮舟始得入花  
放春波妍雞犬亦避俗  
何論魏晉年

樊謙仁

字靜亭號孟齋甘泉  
諸生著天香亭草

春居雜興

爲惜春歸去春歸莫放歸  
素絲魚膾嫩碧玉筍羹肥  
野艇一人渡落花雙燕飛  
送迎隨我意相對久忘機

高

銑

字小邨  
江都人

七夕懷人

虛堂羣動息粉署似滄洲  
衣潤先知雨窻鳴早覺  
秋鵲聲隨野散螢火雜  
星流此際懷良晤徘徊看斗牛

早秋晚眺

寂歷空庭望看雲憶翠微  
蛩催清露落鴉帶夕陽歸  
舊恨聞

吹管新愁聽搗衣更堪截月白深照入書幃

江晚

漠漠江村暮漁燈幾處明水光與天合山色接雲生却待故人至能教俗慮輕宿鴉棲未穩尚有競巢聲

黃修溥

字伊在號寄亭江都人歙縣籍諸生著寄亭詩集我齋文集孫承吉戊午解元乙丑進士官廣西知

縣著夢  
陔堂集

宿野寺

飄飄投野寺落落遠鄉關隔水沙邊竹連雲戶外山燈昏如客倦樹老覺僧閒借問經過雁長鳴可是還

史應兆

字典玉江都人雍正癸卯舉人官內閣中書

春歸

錦簇韶華歎逝川柳條不繫別離船從今海角天涯去粉褪

香銷又一年

沙

揚

字根雲儀真人著青岳集張寄送云根雲與蔡芷衫施小鐵論詩以復古爲已任太僕陵陽集自序

有友人蔡芷衫沙根雲頌然之語沙年未三十卽歿

雜詩

天地至寥廓經緯各有紀以茲方寸心觀變窮太始滔滔昧其源循循戒方軌萬象盡沈冥誰能測其裏荒雞時一號白日爛昭只

割刀取其用驚刀重其聲庖丁本賤技安得自言尊騁然衆理解從律聲成文道與氣相完四顧復何云

塗潦本易竭下不知重淵邱陵本易踰上不知九天浮沈一異勢會面無由緣何況孤鳳音結響流蒼天雞鷺方亂聒暮據高樹巔

卞之澳

字衛瞻號蓼亭儀徵貢生官石埭訓導王小村云蓼亭先生家基沙洛守程朱言行不苟著性理約言諸書爲吾師乎升徵

君叔曾祖師能傳其學

登高

登高望遠俯蒿萊海內誰稱大雅才勝事惜多爲境悞好花  
恨不及春開山光迴出清秋淨江色遙從返照來詩思鄉關  
空寂寞暮雲相伴且啣杯

元日曉起

衆鳥懽陽春萬山開霽色天道固有始人生何所極來日喜  
方長時哉不可失何以報君親事業須努力

懷陳滄洲先生

白雲愛山靜幽鳥鳴空林懷君輒欲往流水知我心

卞翰年

字憲思之澳子諸生著蓂汀集

孤雁

共有雲霄志，偏傷離別情。  
關山寒失路，風雨夜頻驚。  
孤況憑誰訴，高天時一鳴。  
微禽尙如此，顧爾旅愁生。

春日雨花臺晚眺

春山薄暮望高處，多寒風烟火萬家。  
集樓臺殘照中，江光一  
回首，雲氣生虛空。  
歸人隨鳥下，幽懷迥不同。

陸

培 字厚村號植  
軒寶應諸生

感懷

功名不早立，將爲終身憂。  
少壯能幾時，日月奔如流。  
我年已老大，素志未一酬。  
枉負知己遇，常抱國士羞。  
投筆事戎行，開邊非良謀。  
不如修初服，樂命守故邱。

沈

領 字驪球號大瓢如臯貢生黃艮男云大瓢工詩古文詞善飲工書有趙董遺法著補硯山房詩文集

新莊

放艇城南路平堤水一灣橋通烟水際人出翠微閒俗朴猶存古村深如在山早知幽勝地來往日開顏

沈

詹字力人亦字瘦夫大瓢子布衣著補硯山房詩集

七夕集文園

水沈烟斷半簾秋閒倚闌干待女牛竟夕涼思感離別碧雲歌罷海西流

黃

沆字公言泰州人

聽韓經正彈羽化操

夜靜羣聲寂枯桐響更停鶴鳴瑤草綠鸞舞玉山青霜咽橋邊笛風停月下箏空堦音未絕梅影過春亭

余

洋字星源號半菴如皋人夙負才譽慎郡王重之留客邸中選集縣縣丞丁艱未仕著于路草燕臺



集

味甘亭夜坐應教

亭迴山當檻窗虛月滿廊烟深留石色風定識花香久客憐  
平子深恩感孝王青尊傾永夜戀賞詎能忘

留別故園同學

攬轡登車學浪游西風衰柳動離愁天高雁唳千山月露冷  
蟬吟萬樹秋入世浮名眞是夢經年拙計竟如鳩萍踪從此  
天涯外遑問梁州與趙州

黃德溢

字沛四  
泰州人

春山

望望江天迴春山碧落中日晴嵐氣動雲淨石門通苔蘚鋪  
幽磴花枝冷梵宮杜鵑啼不住疑在最高峯

王雍錫

字京式  
泰州人

寄懷蔡九霞

江南忠烈舊門牆嶽嶽儒宗衆所望  
倒屣愧非王粲後執經先認鄭公鄉  
遙憐夢老平山路已報花飛響屣廊  
計到蘇臺勞貰酒却看桃塢又斜陽

宮繼蘭

字貞吉號蕉  
麟泰州人

南枝雜咏

爭傳文事却萊兵仙客揮毫帝子驚  
出守儒生新按部行河使者舊知名  
宛鳩有翰思明發寸草無暉報紫清  
莫訝歸途貧徹骨白雲深處一身輕

楊允升

字贊皇  
通州人

初度有放生之舉

二萬餘場對酒時月明橋上漢宮眉烟霞天放此翁醉婉孌  
誰憐季女饑到處攜家忘作客閒來寫畫媿非詩窮途敢市  
蟲魚惠兵燹刀砧易地思

陳王陞

字士振  
江都人

代愛妾換馬

顏色君所見歌舞君所知恩愛有時盡去去不須疑知君自  
負豪俠士常思立功報天子玉鞍金勒鐵襴褕逐電追風日  
千里君騎良馬帝京去長驅又無妾爲慮轉戰功成封列侯  
何處獨無燕趙婦妾非千金軀也自換名駒猶勝空相贈揮  
手屠與沽君拭淚痕暫相慰覆水難收何用諱勸君努力不  
須論莫負從前愛與恩一身今日輕如葉羞對新人心更怯  
紅顏自古薄命多寧作老女毋作妾

劉

暖

字石菴  
江都人

卽事

已屆清和節猶聞風雨聲流鶯白日靜燕子落花情湖市無  
兼味柯胥有舊盟遙知行路險不復計歸程

黃天嗣

字孝昭江都  
人著淡山集

平山堂聽曲送顧友星之都門

半春慈母病未敢探春光因送故人棹來登太守堂荒烟流  
古道落日在垂楊此地傷離別歌聲總斷腸

海陵冬夜

已把功名付釣簑海天僻處喜重過借他破屋留高士贏得  
殘燈發浩歌白髮幾莖公子老謂姚  
寒玉青衫此日淚痕多謂白  
孟新  
殷勤各進寒城酒莫到臨岐喚奈何